

Dithero tsa Tirelano mo Kutlwanong

39/2013 Thero ka Sontaga wa 09 morago ga moletlo wa Borarobongwe/Trinitate, e le ka 28. 07. 2013

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 7 - 7/7

2. Thapelo: Morena, Modimo wa rona yo o mo legodimong, re a go leboga, ka o re bitsa, o re laletsa ka go bua le rona ka Lefoko la gago mo tirelong-Modimo e. O gogele dipelo tsa rona mo go wena gore re boloke Lefoko la gago, re le utlwe go bona botshelo ka lone ka go dumela mo go Jesu Keresete, Morwao yo o rategang. Amen.

3. Epistolo ka fa thulaganyong ya 2 e kwadilwe mo go Bafilipi 3:7-14;

Efangele ka fa thulaganyong ya 1 e kwadilwe mo go Matheo 25:14-30.

4. A go ipolelwe tumelo ya bokeresete!

5. Sefela sa 33 - 31/30

6. Thapelo ya mmadi wa thero

7. Efangele ka fa thulaganyong ya 5 e kwadilwe mo go Matheo 13:44-46, e re: "Gape, puso yo magodimo e tshwana le lohumo lo lo fitlhlilweng mo tshimong lo motho o neng a lo bona, a ba a lo loba; mme ka go lo itumelela a ya a rekisa tsotlhe tse a nang natso, a reka tshimo eo. Gape, puso ya magodimo e tshwana le moreki yo o batlang diperela tse dintle. Ya re a sena go bona perela nngwe e e tlhwatlhwa e kgolo, a ya a rekisa tsotlhe tse a nang natso, a e reka." Amen.

8. Thero: Barategi mo Moreneng wa rona Jesu Keresete, nte ke simolole thero ya me ka dipotso: Kgoro ya legodimo e kae? A kgoro ya legodimo e bonwa koo? Kgotsa a kgoro ya legodimo e nna le wena re batlang go tsena mo legodimong ka yone e ka bonwa mono lefatsheng? Gape, go tsenwa jang mo bogosing jo Modimo o leng kgosi mo go jone? Nka busiwa jang ke puso ya magodimo, e bong puso e Modimo o

busang mo go yone? Dipotso tse di batla go arajwa ke Lefoko le thero ya kajeno e theilweng mo go lone.

Lefoko la gompieno le ruta ka ga puso ya magodimo ka go e lebaganya le lohumo lo lo fitlhlweng mo tshimong nngwe. Jaanong tshimo e mo go yone go fitlhlweng lohumo ga se gore o ka bona ka matlho gore e na le lohumo. O ka tsamaya mo go yone o sa lemoge gore ke tshimo e e nang le lohumo tota. O ka e kaya naga fela. Kgotsa o ka e kaya tshimo e e tshwanang le masimo a le mantsintsi a mangwe. A o lemoga gore Morena o re ruta gore bogosi jwa Modimo bo ka bonwa, e bile bo ka fitlhelwa fa motho a sa gopolang gore bo ka bonwa teng.

Re gakologelwa badisa mo nageng, re gopola segopo sa dipitse sa kwa Betlehema, re gopola sefapaano sa kwa Golegotha. Re a lemoga gore fa Modimo o ka bonwa teng ke mafelo tota a motho o sa gopoleng gore Modimo o ka bonwa mo go one. Le mo malatsing ano Modimo o ntse wa bonwa fa motho a sa gopoleng gore o ka bonwa teng.

Modimo ga o fitlhelwe o le mo ntlong ya bogosi e e phatsimang ka gouta. Nyaya, lohumo lo fitlhegile mo mmung fela mo tshimong. Gongwe ke tshimo e wena o setseng wa e gata ka dinao tsa gago gantsintsi o sa lemoge gore lohumo lo fitlhlwe mo go yone. Gongwe lohumo lo ka bonwa ka motho yo o se nang boemo le fa e le thutego e kgolo. Gongwe lohumo lo ka bonwa le fa e le mo bolwetsing jo wena o itshwenyang ka jona. Motho yo mongwe o ka feta kago nngwe ya kereke e e mo tikologong ya gagwe fela gantsintsi a sa lemoge gore lohumo lo lotona lo fitlhlwe mo kagong eo. Gongwe ga e na bontle, le fa e le ba bantsi ba ba phuthegelang mo go yone. Ke mang yo o gopolang gore lohumo lo fa gare ga bone? Puso ya Modimo e tshwana le lohumo lo lo fitlhegileng mo tshimong.

Ga se gore lohumo lo bonwa ka go itshwenyegela, e bong ka tiro e e thata e wena o e dirang. Re bona gore lo ka bonwa fela jaaka neo e wena o ka e fiwang o sa e gopole. Mosadi wa Mosamaria o bone lohumo, fa a ne a dira tiro e ene a e tlwaetseng go e dira letsatsi le letsatsi, e bong fa a ne a ya go ga metsi. O bone puso ya magodimo a sa o gopole. Le moapostolo Paulo, gongwe modisa wa kgolegelo ya kwa Filipi ba bone lohumo fela jalo. Ba le bararo ba ba bone lohumo lo lo neng lo fitlhegile mo go Jesu. Ke ene yo e leng lohumo lo Paulo a lo eleletsang

fela, a re: Ruri ke kaya dilo tsotlhe tshenyegelo ka ntlha ya kitso e kgolo ya go itse Keresete Jesu Morena wa me yo ke latlhileng dilo tsotlhe tseo ka ntlha ya gagwe; ke bile ke di kaya matlakala, gore ke hume Keresete.

Moapostolo Paulo o latlha go tlotliwa ke bagolo ba Bajuta, o latlha boemo jwa gagwe jwa go itsiwe e le mogale le motlhale wa morafe. Ga a batla boemo le tlotlo mo bathong. Ga a eleletse madi le dilo tsa lefatshe. O di tlogela go huma Keresete. O bone gore ka Keresete puso ya Modimo e tsile go ene. Keresete ke lone lohumo lo lo fitlhegileng mo tshimong.

Keresete ke ene perela e ntentle e le nna ke tshwanetseng go e bona. Ka Keresete kgoro ya legodimo e teng. E bulegile. Ka Keresete re tsena mo pusong ya ona. Ka setshwanthso sa perela re bona gore bodumedi jwa nnete ke bodumedi jo bo batlang perela, e bong ene Jesu bogolo go dilo tsotlhe, ke go amogelwa mo pusong ya gagwe ka go kolobediwa mo leineng la Modimo o o Borarobongwe, le ka go dumela mo go Jesu Keresete.

A re itlhatlhobeng, re re: A nna ke batla puso ya magodimo pele ga tsotlhe? A go huma Keresete le go itshwarelwa mo leineng la gagwe ke se se laolang botshelo jwa me? Kgotsa nako ya me, thata ya me, le dinonofo tsa me a ke di neela ba sele kgotsa di sele? Morena o a ruta gore yo o ratang botshelo jwa gagwe o bo isa tatlhegong, mme yo o tlhoileng botshelo jwa gagwe mo lefatsheng leno o tla bo bolokela botshelo jo bo se nang bokhutlo. Gantsi rona batho ba gompiano re tshela, jaaka e kete botshelo bo bonwa ka dilo tse di ka rekwang. Go batliwa thata thata tse di kaiwang e le tse botshelo bo leng teng ka tsona: Ntlo e ntle, koloi e e phatsimang, di"''furniture" tse di botoka, Cell-phone, eng le eng. Ba le bantsi ba tsaya tsotlhe tse ba nang natso ba e bileng ba adima le se e seng sa bone gape gore ba tle ba hume dilo tse. O ka re, go ntse jaaka e kete dilo tse di elediwang tse di ka go naya botshelo tota. Mme re utlwa mo Moreneng gore yo o sa tlhoang botshelo jwa gagwe, o tla latlhegelwa ke jona. Gonne botshelo jwa nnete go bo bonwe ka dilo, mme bo bonwa ka lohumo lo lo fitlhegileng, lo lo sa bonweng mo mothong wa tlhago, mme lo bonala mo go Keresete. Botshelo jwa nnete bo bonwa, fa ke eletsa perela e le nngwe fela go e bona ka e e fetang di-tsa-me tsotlhe.

Bokeresete jwa nnete bo batla Keresete pele. Bo batla go utlwa lentswe la Morena motlhang phuthego e phuthegang. Bo eleletsa bana ba rona dithuto tsa sontosekole, le legae le go opelelwang Morena le go rapelwang mo go lone. Bokeresete jwa nnete bo dirisa nako le thata le dinonofo le di-tsa-jone le madi mo tirelong ya ga Keresete, e seng go itirela fela ka tsona. Bokeresete jwa nnete bo itse go ikwatlhaela ruri mo aletareng ya Morena, fa bo lemoga gore mo botshelong jwa me ke batla go huma sepe, fa e se Keresete yo khumo yotlhe e fitlhegileng mo go ena. Amen

9. Thapelo: A re rapeleng ka sefela se se reng: Go batlega se le sengwe, o se nthute yo ' nthatang; tsa lefatshe di a tlhabela, le fa di phatsima jang! Ka gonne ke tsone merwalo e ' thata, mme pelo e a lapa, fa e ka di rata. Mme sona se sengwe se se batlegang, ke sona sa nnete, se se humisang. Amen.

Thapelo ya Morena: Rara wa rona yo o mo legodimong ...

10. Sefela sa 228 - 214/222

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke T. Seifert, ka ngwaga wa 2001/2007.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.